

Fios Chun a' Bhàird

Faclan/Lyrics: Uilleam MacDhùnlàibhe/William Livingston

Fonn/Music: Trad.

Tha a' mhadainn soilleir grianach 's a' ghaoth 'n iar a' ruith gu rèidh;
Tha an linne sleamhainn sìochail on a chiùinich strì nan speur;
Tha an long na h-èideadh sgiamhach, 's cha chuir sgìos i dh'iarraidh tàmh;
Mar a fhuair 's a chunnaic mise, a' toirt an fhios seo chun a' Bhàird.

Seo crùnadh mais' a' mhìos san tèid don dìthreabh treudan bhò,
Do ghlinn nan lagan uaigneach anns nach cuir 's nach buainear pòr,
Leab-innse buar nan geum - cha robh mo roinn diubh 'n-dè le càch;
Mar a fhuair 's a chunnaic mise, thoir am fios seo chun a' Bhàird.

Ged a roinneas gathan grèine tlus nan speur ri blàth nan lòn,
'S ged a chìthear sprèidh air àirigh, is buailtean làn de dh' àlach bhò,
Tha Ìle 'n-diugh gun daoine, chuir a' chaor' a bhailtean fàs;
Mar a fhuair 's a chunnaic mise, thoir am fios seo chun a' Bhàird.

Ged a thogar feachd na h-Alb', as cliùiteach ainm air faich' an àir,
Bithidh bratach fhraoich nan Ìleach gun dol sìos ga dìon le càch;
Sgap mì-rùn iad thar na fairge, 's gun ach ainmhidhean balbh nan àit';
Mar a fhuair 's a chunnaic mise, thoir am fios seo chun a' Bhàird.

Cha chluinnear luinneag òighean, sèist nan òran air a' chlàith,
'S chan fhaicear seòid mar b' àbhaist a' cur bàir air faiche rèidh;
Thug ainneart fògraidh bhuainn iad; 's leis na coimhich buaidh mar 's àill;
Leis na fhuair 's a chunnaic mise, thoir am fios seo aig a' Bhàird.

Chan fhaigh an dèirceach fasgadh no 'm fear-astair fois o sgìos,
No soisgeulach luchd-èisdeachd; bhuaidhaich eucoir, Goill is cìs;
Tha an nathair bhreac na lùban air na h-ùrlair far an d'fhàs
Na fir mhòr' a chunnaic mise; thoir am fios seo chun a' Bhàird.